

四庫全書

集部

欽定四庫全書

文忠集卷一百五十二

宋 歐陽修 撰

書簡九

與薛少卿

公期 景祐三年

某頓首再啟東園一別自夏步秋今倏冬矣泝泝絕淮  
泛大江凡五千里一百一十程纔至荆南見家兄言出  
京時有公期書渴得一見要知別後事然數日尋之不

見遂已某自南行所幸老幼皆無病恙風波不甚惡凡舟行人所懼處皆坦然而過今至此嚮夷陵江水極善亦不越三四日可到久聞好水土出粳米大魚梨栗甘橘茶筍而縣民一二千戶絕無事罪人得此為至幸矣祇是沿路多故舊相識所至牽率又少使人作書入京公期始約今冬赴絳州必非久行矣每憶君謨家會頗如夢中未知相見何時惟自愛而已因人便附書在君貺處乃可達今因遣白頭奴入京謹附狀不宣

又景祐四年

某頓首自公期東門之別忽已踰年南北之殊相去萬里音信踈絕於理固然昨至許州蒙訊問備審官下為況甚佳邇來諒惟自公之餘與閭內貴屬各保清休某居此為況皆如常老親幸甚安室中驟遇僻陋便能同休戚甘淡薄此吾徒之所難亦鄙夫之幸也多荷多荷公期遊宦故鄉其樂可量思昔月中琴奕樽酒之會何可得耶某久處窮僻習成枯淡頓無曩時情悰惟覺病

態漸侵爾敝性懶於作書區區思慕之心非有怠也惟  
仁者察之讒謗未解相見何由惟慎疾加愛因人至京  
頻示三兩字為禱其如方寸莫能盡也不宣

又 康定元年

某頓首再拜公期九哥足下比者伏審五丈人丈母相  
繼傾亡聞訃交至不勝悼怛苦事伏惟罹此酷毒摧痛  
哀慕奈何奈何孝子之志在於不減更望節哀就禮以  
全大孝是於親友為大願也自去秋質夫有事顯侯公

期替歸不意遭此凶變知扶護且歸絳州未審何時可  
至京邑一別數歲某走萬餘里艱險備嘗公期又有此  
患人生若此可嗟可嗟八哥在京尚未有差遣亦欲求  
一住京所貴照管君貺與某亦時時到宅內外如常不  
慮中前君貺行曾有書札為有起請不肯附去今同封  
呈前後累寫下書皆因循不附去得悚息悚息秋寒哭  
泣扶護千萬寬節以副區區謹奉此致慰

又慶歷三年

某頓首啟自公期到京便欲拜見初期見訪尋以某欲入都遷延至此近以定日必行一夕小兒輒病遂阻行計然猶幸僅存其生至今尚未安所賴有可醫理行既無涯虛滯軒車久阻歸計慚惕料某不往公期便行也企渴企渴他具夫人書記累辱問小兒病無慘中未及奉書市藥甚煩挂意春暖各希保愛瞻祝瞻祝不宣

又 皇祐二年

某啟到此已將百日牽率如初以此久不奉問遞中并

人至兩辱書承寒來寢味多福霈恩進秩不敢為賀彼  
此然也某此區區幸事漸少稍息肩奉告作鞍蓋為郡  
人哂其太陋爾相次專人附銀去式樣一依官品可也  
冗事乃煩長者惶恐惶恐餘具後信冬冷保重

又嘉祐某年

某啟累日不相見承在軍器庫中必甚勞神暄和體氣  
喜佳裕玉冊官便當遣去有暇因出見過看漢碑今日  
私忌家居恐知

又 嘉祐某年

某啟昨日見妳子自宅中歸云公期猶患臂疼不審旦夕來尊候如何今日欲於軍器庫中奉問又恐不入為前日所見偷竊者驚家人欲於宅西添一鋪巡警不知有例否夫人言公期宅前曾勅添一鋪不知申報何處施行略希批示因出閒過少話某再拜公期郎中 十二

日

又 嘉祐某年

某啟昨夕承過顧經宿熱未解甚可苦也體中安和數日有人將一馬來行亦快不見驚蹶不知毛骨如何云要百千為定價值否試令牽呈昨夕忘却閒說及幸告批示革解九方專令咨請不罪不罪

又 嘉祐治平間

某啟昨日作書未及發忽得來介所惠書頓釋月餘憂想之懷家人尤以為慰也所喜涉暑到官尊幼各安寧仍知頗以郡事為意如此日月亦易消遣某嚮在夷陵

乾德每以民事便為消日之樂苟能如此殊無謫官之意也某偶因用街市淋洗藥拔動風氣左脚疼痛數日在告不意傳報特煩軫念感愧感愧盛暑公外加愛家人亦自有書此不多述不宣

又嘉祐治平間

某啟近併捧三書具審至汝以來動靜甚慰企渴爾比日竊惟公外體履清福貴眷各安和今夏京師大熱疾疫尚未衰息頗聞許洛特盛幸喜汝獨無之雖然郡事

久不治下車之始不無勞心今必稍簡則漸可樂矣崔  
庠案已斷邸報必見罪狀不若初聞之可駭然刑名亦  
重舉主多不克茲亦奈何淄州近不得書應是煩惱某  
今歲病暑飲冰水多目生黑花多在告舉家幼小幸安  
最後將書來人戒渠來取書輒私去故於遞中致此暑  
伏方盛慎愛不宣

又 嘉祐治平間

某故多事忽忽等閒不奉狀遂復逾月茲者楊氏子來

辱書承秋來公外動履清康貴眷各安粗以為慰郡事以太守養疾甚煩裁處然臨以餘刃莫不為勞苦加之歲事豐成盜訟當漸稀簡也某以私門過夏嚮秋幸且安帖祇是孤危之迹勢漸難安羣口籍籍外亦應聞病目愈甚承惠藥方便當精意服之也連日從駕歸遂卧病兼亦筋力去不得也餘俟家人自有書殘暑更冀以時自愛以副瞻企

又 治平二年

某啟近以雨水為患舉家驚奔所幸人物尚無傷損偶  
居定力公私擾擾久不附問急足忽來惠書承秋來公  
外體履清福貴眷上下康安稍以為慰報國無狀致此  
天災皆由時政多闕上貽聖憂方共引咎遽承見教丁  
寧切至蒙愛之厚愧感銘藏而已知汝極豐郡政脩舉  
盜訟遂稀應多閒暇之樂也某忽忽無怵病目如在昏  
霧中作書甚艱餘不遑及嚮寒保重因風時枉問

又 同前

某啟新陽納慶伏承動履多福人至辱書感慰無量京師水後繼以陰雪甫近郊禮次開晴青城宿齋雲日澄和人情舒暢遂成大禮衰朽之質執事忘勞前此公私事叢久闕致問自是而後應且休息一晴鎮遏無限浮議天幸天幸餘非筆墨可罄人還僅布一二深寒多愛

又 治平三年

某啟自承受勅後日與家人望軒騎來歸何久而絕不聞問春夏之交氣候不常不審體况何似想與貴眷各

安某此內外如常但自春來病渴淋不止在告多日乞  
一近郡養疾已二削竊料旦夕當至都門故專走兵迎  
候其他須面敘病中不悉

又 熙寧元年

某啟近法曹廳人回特惠書經節竊惟公外氣體安和  
某到官忽已兩月幸與諸幼如常但老病益衰民間興  
利趨公事目百端昏然並不能省若常時公事則絕簡  
過客亦稀苟祿偷安負愧而已公期臨郡已多時莫須

別有差遣某以病苦難久尸居歸心有素何日遂如所願相見未涯窮冬盛寒惟加攝為祝

又 熙寧三年 此帖又載  
第八卷却云與王學士

某啟急足至辱書喜承尊候萬福貴眷各安甚慰企想  
近入京衙校過賴捧手教尋於遞中奉狀必達視聽某  
到此以弊止未完固少畱以算然欲遂為挂冠之請遠  
近相知皆相督以蔡是自乞須且勉赴到任徐請歸休  
未遲今遂治行二十一二間上道三四日至蔡別拜狀

恐久滯急足忙中作書不悉

又 熙寧四年

某啟專人辱書承秋暑體候康適貴眷安寧甚慰甚慰  
某茲者告老得請恩典殊優出於萬幸賴祭至近雖冒  
大熱信宿便至遂為閒人庶事皆如素計惟當營舍久  
而僅了族大費廣生事未成倫理頗亦勞心然措置稍  
定不復更令入耳則是人間無事人爾知幸知幸承冬  
中當替歸可遂相見豈勝欣願但恐未間別有美命也

某此老幼幸如宜聞相去祇四程必時得書問往還殘暑公外多愛

又 同前

某啟迓吏過州辱書承經寒體况清裕貴眷各安甚慰勤企某與諸幼幸各如宜自還田舍已百餘日庶可稍成倫理粗免勞心始覺漸有閒中趣味然目足之疾初未少損益累年舊苦勢難頓減又迫於年齒愈老而益衰其如坐享厚俸飲食無為徼倖之愧感激而已承美

替有期冬末行舟淮潁當得一會面但恐未間別有美  
命就移不然豈勝欣望也深寒未相見間多愛多愛

又  
熙寧五年

某啟自使舟過郡閒門庶事之力又值雪寒難於舉動  
加之病齒妨飲遂不成主禮退居屏迹惟交親難相會  
每以為恨幸一相見又事多艱滯如此信乎人事如意  
難得也然尚得靜話數日爾人至辱手教承宿來尊候  
萬福知詰旦遂行嚮和惟多愛

又同前

某啟近辱書喜獲平安到京甚慰傾企乍至都下人事  
必多仍審已謁告歸絳州何其速也不亦少勞乎即日  
春暄竊惟氣體清適某自相別後令醫工脫去病齒遂  
免痛苦然至今尚未敢放口喫酒情悰索然但覺一歲  
衰如一歲爾集序已了祇候更了鐫刻一併納呈閒居  
難得人便附書比此書至京計已西去故令人齎轉附  
至絳故未及其他惟嚮暖保愛早還以副瞻思

與陳比部

力

嘉祐治平間

承有家計賢妹有事竊惟悲痛老年親戚間不免時有  
煩惱人生常理只如此時暑千萬節哀寬中無由奉慰  
來日令兒子至寺中也五妹且省煩惱時熱圖安也某  
再拜作坊殿丞良親

廿七日

又

嘉祐治平間

某啟承昨日寺中舉掛時熱惟希寬中又知喫食所傷  
更須慎護辱惠茶具甚精竒多荷多荷藏之他時為間

居之用爾今則少暇也五妹喜安極熱未敢相邀歸家  
好將息某再拜作坊國博之右

旬休日

又 同前

某辱惠答簡承臟腑已安和甚慰惠茶籠所作極精至  
石屏大是竒物可珍可珍但不得中間一片則不成器  
千萬為早取之此物他處未嘗見石屏世故多有未有  
若此簡易而工妙也稍涼見過閒話某再拜作坊虞  
六娘兩日患臟腑今却安也果子自此更不令喫幸

荷幸荷

又同前

人至承惠簡喜酷暑中與貴眷各安數日大熱恰值謝  
官人事紛紛疲朽遂不克支若非昨夕一雨少解煩毒  
其將奈何頻勞問念多感多感某再拜 住娘近日頗  
肯忌口亦漸向安謝念及也

又嘉祐治平間

多日不相見天氣陡暖喜與五妹各安和惠簡問及牙

疼多感多感兩日稍可雖浮動醫者云取未得須候根  
脫取之省力恐知恐知驢肉多荷多荷某再拜作坊虞

部良親 廿二日

又同前

某啟承惠蘇家藥多荷多荷亦嘗用之此但治咽喉爾  
某所苦者齒牙熱痛兩日來漸較蓋稍節滋味等物遂  
可爾過承憂念五妹歸家安否後日祠事畢便歸當得  
相見人還專此為謝某再拜 只前時兩般藥自好方

待久使也

又熙寧元年

某啟久不得信方深企想送劉司理兵士至辱書承公  
外體候安和四郎以下諸幼各安甚慰但以亡妹忽已  
週祥舉家見書信至重增悲惱爾某此老幼幸亦如常  
久欲作書只為累表乞致政未允候見去住後發書奉  
報爾今又忽有青州之命已兩次辭免欲且乞守亳蓋  
去頰近便於歸計也未知如何也知吾親每每多不安

遠宦中有此煩惱誠難為情更宜寬心求安為善也七  
妹靈柩今冬先送歸晉最為上策嚮寒千萬保愛不宣  
某再拜知郡比部良親 九月八日

與馬著作

嘉祐中

牡丹記荔支譜久欲附呈以候刻跋尾數十字以是稽  
遲不怪不怪病目固不能書然君謨不肯為他人書而  
獨為某書此朋友間自是一事不可不記故勉自書取  
笑取笑

又 治平四年

某啟近縣人還奉狀新歲布和善人君子自宜亨福惟  
餘齡晚暮益以病衰相見未涯徒積傾嚮鄙抱區區前  
書粗布政餘加愛某手啟知縣著作足下 十二月十九

寄惠花燭白蕈多荷多荷蕈豈非自種耶甚佳  
甚佳泉水未為爾必以冰凍賣致未得也

又 熙寧元年

某啟專人辱書并以泉水為貺豈勝珍荷兼審新春履

味清安河夫之役尚煩神用然處置得宜公私俱濟則  
所利博矣亮不以為勞也某再乞壽旦夕必見可否未  
間難為期約也當續咨報尚寒慎愛不宣某手啟知縣  
著作足下十九日 李集已領泉味皆佳然大抵東州水  
甘直須於鹹水地飲之然後為貴爾

又

某啟病悴之餘人事疎廢忽辱惠教方承臨莅齊城經  
署公餘清適誨諭稠重開發蒙鄙感愧感愧咫尺未期

會話欽渴欽渴某再拜病目多書字不得不罪不罪

又 熙寧三年

淮西支郡蕭條何敢奉屈然吾儕以道為樂亦應不以  
間要為計某至潁且少盤桓俟如蔡即當發削若遂所  
乞衰拙之幸多矣塗次餘未及詳

又 同前

最後一削甚懇意謂可以免并遂蔡何幸如之其餘區  
區未可卒布但不一會見尤為恨爾保愛保愛

又

某啟官守相望咫尺未親言語惠書勤眷兼以嘉篇富麗之作老病無悰得以拭目頌增鄙思也欣感欣感高材尚滯一邑秋冷多愛某奉白著作足下

與顏直講

長道

某啟嚮傳例罷學職初聞可疑及辱書始駭果然又承有淮陽之命君子出處不違道而無媿則所居皆樂况淮陽近家之便乎亮不動浩然之氣也交年積雪極寒

體况想佳計行李不久當東相去逾遠會見何時千萬  
加愛

又 治平四年

某啟嚮在京師會吾子來人事忽忽不能以從容接高論  
及至毫聞還直學館出處相失誠可悵仰近惟經寒體  
况清適某退守僻州甚為優幸而衰病侵凌心志昏耗  
諒難久竊榮寵也目疾為苦臨紙艱於執筆鄙懷莫罄  
新歲惟冀加愛

又熙寧元年

某啟董君來辱惠音竊承履况佳適感慰曷已學館誠  
岑寂然塵事不到足以專志經籍則其所得與其所樂  
豈不多哉某今春日疾愈甚東州民物可樂處多但自  
以衰病少悰爾董君到必為言也

又同前

某啟衰病人事多廢久不奉書遞中辱問承經寒體况  
清適學舍久淹然以道為樂必無倦也某兩日益昏難

久勉強乞壽已再旦夕冀得請西歸近頴為便爾相見  
未涯鄙誠莫道

又 熙寧二年

某以病昏廢學情禮亦多闕東州一任寄委勉強常憂  
曠敗請壽冀未退休間苟安於藏縮爾久不聞道義之  
益與諸賢者迹日漸疎但欽渴而已

又 熙寧三年

某啟近辱書承春寒為道外無恙甚慰企仰竊憶去秋

將離青社曾一奉書未審得達否某衰病如昨幸得閒  
暇偷安但苦病目不能看書無以度日詩義未能精究  
第據所得聊且成書正恐眼目有妨不能卒業蓋前人  
如此者多也今果目視昏花若不草草了之幾成後悔  
所以未敢多示人者更欲與二三君講評其可否爾但  
未知相見何時也報筆特艱莫布萬一漸暖加嗇

又 熙寧四年

某啟近辱書承涉暑講道外康和甚慰兼蒙以鳧繹先

一有集為示某自少時常得傳誦數篇每恨不見全編  
生字

不意茲時頓飢渴藏家著錄以傳後世榮感榮感某  
以經春老病在告近已復尋在毫之請方治裝以俟命  
區區未遑悉布惟毒熱加愛

又同前

某茲者得請歸老恩出萬幸惟所苦渴淋自春發作經  
此暑毒尤甚蓋以累年之疾勢不易平然自此安閒冀  
漸調養爾兩目昏甚艱於執卷顧難銷晷景又親朋之

會邈不可期恐遂不聞道義默默寢為庸人爾殘暑加  
愛

又 同前

某啟近小史

史一作

許克行奉書方在道人自都來又辱

惠問豈勝感媿兼承秋暑為况多佳某自蒙恩許其告  
老榮幸感激之懇前書已粗布惟乍還里閑人事少勞  
而舊苦目足之疾得秋增甚舊書編藁未經一二君商  
榷今遂復田畝會見無期此為恨爾餘粗如宜幸不多

恤嚮冷惟加愛

與梁直講

某啟衰病退藏自宜屏迹忽辱惠問雅眷不忘其為感  
著未易遽陳兼喜春和氣體清裕董直講來自學舍具  
道羣居之詳今其還也亦備見郡齋之况燕譚之際諒  
可及之病目愈眊然艱於執筆惟以時加愛

與直講都官

熙寧元年

某啟自離亳更闕奉問春氣尚寒體履清勝某昨辭青

不獲勉策病軀東來而東州士俗深厚歲豐盜訟亦稀  
甚為養拙之幸而獨苦衰朽老疾日增爾歸計遷延更  
須年歲也學舍久淹匪朝必有美命未間玆愛某再拜  
直講都官足下 正月九日

與曾學士 熙寧三年

某啟近因人還得附拙記薦昨書尺其為愧荷可勝道  
也兼審秋寒提按之暇動履清福某去蔡咫尺以病足  
為梗少留於此忽復踰月匪晚向官所壽蔡相望時得

拜問旅寓中草率為謝

與王補之

熙寧三年

某啟近者行舟過界上特辱惠書喜承秋冷氣體安和  
以至郡道里差遙不敢曲邀車騎又失於上問全乏迎  
候豈勝愧恨某蒙恩得請郡僻事簡衰年疲病苟祿偷  
安甚為幸也歟見未涯以時自愛

與謝景初

皇祐元年

某拜啟久不作書蓋由無便即日為政外奉親萬福某

幸且安郡僻少事然漸老懶於為學惟喜睡爾足下為道方銳著述必多此急足回無惜為寄春寒保重

論徐嶠稱弟子帖

春首餘寒惟閣黎動止安穩弟子虛乏繆承榮寄蒙恩獎擢授以洛州一歲三遷自南徂北既近都邑忝竊彌深便即祇命未由預謁瞻望山門但增淒斷戰懼之情慙惶失據願環重不宣弟子徐嶠和南

某啟承惠佳篇豈勝欽服昨日見顧遂當祇詣曾不為

言其如清宴佳賓難復多得若曰春秋為義當得徐嶠  
筆法何用於閣黎稱弟子自南朝起此弊事遂成風俗  
其如近日士人佞佛者少宜於此時力與革此弊事惟  
在賢者為之禮曰君子動而為世法然則舉措其可不  
慎哉金氏世以財雄南方今乃出佳子弟其可愛也雄  
漠瀛霸保州粉紙謂不可書請試察

試察之下尚隱隱  
有字漫滅不可讀

不知與何  
人帖也

與修史學士 嘉祐三年

某啟辱教開發蒙滯實寡陋者之幸也早來寧王憲只為更名與鄭王嗣直數人同須再出封國其它更有易名者偶不徙封爾就中此卷錯處多然捨此更無也某

白

又

某啟前日承惠服屬圖寡陋蒙益何勝感愧欲見當年修真宗實錄人官職姓名差官及書成年月告與檢示不罪相煩八日某拜白晉叔學士

又

多日不奉見春暖康和中間承見惠臘雪散者或有更

乞少許某再拜

外題簡呈  
修史學士

右三篇見秀峯隱居法帖或云與呂夏卿呂字縉叔  
嘗同修唐史晉字疑省文

與人

辱留郡兩日偶客多不及款話惟望慎疾自愛俗子多  
是非難防勉強接納小疾不足過疑却恐過當服藥致

生疾耳二者愚慮恃眷舊敢然悚惕悚惕公議難過亨  
復匪遙他不足道也區區某又拜

文忠集卷一百五十二

欽定四庫全書

文忠集卷一百五十三

宋 歐陽修 撰

書簡十

與十四弟

煥字大明

皇祐二年

某啟仕宦多故久不附書冬寒計與諸眷安和某為太君年老多病未能一歸鄉里親拜墳墓祖墳更望與照管餘託鄭齋郎致意此外保愛不宣某書上十四弟秀

才閏月六日

又 皇祐五年

某罪逆深重不自死滅禍罰上延太君以去年三月十七日有事攀號冤叫五內分崩不孝深蒼天罪逆深蒼天見在潁州持服昨者鄭齋郎自鄉中來得十四弟書知與骨肉奉親各安某為於潁州卜葬所以未及歸得只候服闋南歸相見書言回陂樹倒但勿令人斫伐為幸諸大小墳域且望更與挂意照管年歲間某歸相見

餘不多言今因嗣立人回奉此不具兄押書寄十四弟  
秀才四月七日 亮墨宣筆表遠信

又 同前

十四弟秀才前者嗣立人力回曾附書及筆墨等想得  
達邇來暑熱上下各安某今者扶護太君靈柩歸葬先  
遣嗣立歸凡有可幹事為嗣立少心力吾弟且與同共  
勾當相見不遠秋熱好將息不次某書白十四弟七月  
十五日

又 同前

十四弟昨自扶護南歸得相見庶事頗相牽率自別計安諸姪亦計無恙某初十日已至家一行如常但憂墳塋惟託勤為照管諸已面諭更不言也此外教諸姪為學各令謹慎為佳時寒好將攝因人頻附書來言墳頭子細是切不具兄某書送十四弟

又 皇祐六年是歲三月改至和元年

十四弟別後計與諸眷各安自離吉水後未曾得來書

中間景歸曾有書必達八郎近寄信來回陂門垣及水道並已改了不知是否因書言及今因寒食遣人力去上墳望與至少卿墳頭一轉為地遠只附錢去與買香紙酒等澆奠小叔西街小大郎諸骨肉並與伸意前曾附書更不寫書也更附錢五伯文與回陂墳頭張旺取伊一領狀封來仍指揮伊脩蓋牆垣看鎖門戶千萬千萬如有事書中細與言來春暄各好將息不次兄押書送十四弟

又至和二年

書寄十四弟秀才久別計安樂吳榮來得書回陂墳所  
必與照管今因寒食令人力蕭及去上墳將錢伍伯省  
請與買酒食去澆奠回陂墳并與覷當垣牆門戶錢一  
索與看墳張旺仍指揮伊覷當樹木及取領狀一紙來  
春暖好將息不具兄押書白十四弟秀才二月四日

外封

題云書附吉州小市三院巷兄翰林學士知制誥史館  
修撰兼修唐書勾當三班院某令其玄孫名鈞龜嘗請  
鄉舉尚居北巷  
仍藏公之真蹟

又嘉祐元年

人力來得書知骨肉並安深慰深慰為今春使契丹寒  
食不曾遣得人往墳所吾弟並與到諸墳深感深感修  
見乞洪州亦只為先墳也未得間恐吾弟因出入且為  
照管兄押書送十四弟四月十五日

與十二姪 通理 皇祐四年任象州司理

自南方多事以來日夕憂汝得昨日遞中書知與新婦  
諸孫等各安守官無事頓解遠想吾此哀苦如常歐陽

氏自江南歸明累世蒙朝廷官祿吾今又蒙榮顯致汝等並列官裳當思報效偶此多事如有差使盡心向前不得避事至於臨難死節亦是汝榮事但存心盡公神明亦自祐汝慎不可思避事也昨書中言欲買朱砂來吾不闕此物汝於官下宜守廉何得買官下物吾在官所除飲食物外不曾買一物汝可安此為戒也已寒好將息不具吾書送通理十二郎

又

承示近文祇如此作得也但古詩中時復要一聯對屬  
尤見工夫并門當因書言去昔選人有陳竒者舉上十  
六人仁宗見其未嘗歷選調特旨不改官以戒馳騫者  
初官宜少安之

與十三姪奉職

皇祐五年

奉職自赴任不曾得書到官下想安樂汝孤寒曾受辛  
苦知道官職難得每事當思愛惜守廉守貧慎行則保  
此寸祿而已十四郎今却令回此子自縣中來見其衣

裝單薄汝只親兄弟兩人今食祿庶事宜均給更且戒約勿令出入無事令學書識取此字從來失教訓是事不會男子如此何以養身今遣人去知府舍人處求太君墓誌若此人將得來即更不言若未得來即汝因事至府中面告言吾令汝請文字且與請取求的便附來春寒好將息不具吾押送十三奉職

正月十四日

十四

郎此中與綿襖子兩領并裏纏錢三索省只十七八程可到恐伊別亂破錢也

與大寺丞發 治平四年

王澤與書未行間孫宗古來得汝書知與幼小各安甚  
寬憂想惟真所傳神改了甚善梅都官者必已畫了所  
是韓孟惟真既言自有本便可畫也須是四燈頭面髣  
髴一般大小方好看且傳語催伊早畫了才到毫便去  
取也押付發 宅圖且勿與看 梅須亦戴接羅不然  
戴楮冠子但取好畫隱士帽亦好

又 同前

吾二十五日離潁二十八日一行平安至亳初二日上  
事臨離潁時累有書去約汝於遞中發書令先至亳及  
至此兩日杳不得一字何故何故以此不無憂想不知  
爾來汝與諸幼各安樂否迎孫婆孫入夏來長進否婆  
孫瘡癢較未不瘦否此吾日夕所念也今專遣急脚子  
去勾當將來山陵發引排祭一事汝宜用心速與問當  
早令回報蓋慮後時難辦也其餘事更三兩日黃清去  
別有書也此外夏熱汝與諸幼各好將息遞中頻發一

書來不必須候專人也五月二十九日至亳後第一書  
押付發 今令急脚子計會王昌及杜延禧問當進奏  
官及轉問北京定州進春官前次仁宗山陵發引時北  
京定州排祭用何儀式其祭前排列明器人物等用多  
少數目祭食味數贈作錢馬數目並令一一問取令體  
例來今別具畫一劄子汝速召王昌杜延禧令體問早  
令此急足回來要作準備如杜延禧短使即令王昌用  
心勾當不管悞事此急脚子回時買明黃羅一疋附來

又同前

初三日遣急脚子發到亳州後第一書為問山陵致祭事  
書必已到此中兩日內却併得遞中來者兩書知汝與  
諸幼各安只是聞得婆孫患臟腑後甚煩惱蓋孩兒三  
好兩惡已多時且須用心調理及知道妳子亂喫物道  
不得但向道候到亳州用你不得迎子何不與青鯨丸  
喫此是汝小時服之得効者前時王澤附去者豆蔻丸  
亦是汝輩患臟腑時得効者可與婆孫喫醫人藥中用

黃連甘草者與兒喫此中日夕惟是憂煩二孫過夏不  
易且喜汝今夏一成安樂然更須慎食生冷吾自蔡河  
舟中大熟食生冷不節所以到潁渴淋復作潁肉誠不  
及京師乍從京師來誠不好及食之日久亦不覺酒則  
絕佳於舊日巨魚鮮美鰕螬極多皆他郡所無以至水  
泉蔬菓皆絕好諸物皆賤間居之樂莫此若也吾此只  
為一歲計不候宅成只候買得材料便決去躬親蓋造  
必更精潔也此郡閒僻來去間足以頤養孃瘦及食少

心頭氣滿與其餘並如在京時汝可勿憂黃清李德令並遣回餘事當續附書此外夏熱汝曹各好將息稍無人便即於遞中附書千萬六月七日第二書付發押

王昌令買明黃羅一疋白生羅二疋已指揮與也要知要知 七郎得書知在京安樂且與頻照管 山陵致

祭紙錢贈作駝馬等此中可造惟是祭前排立人物此中做不得須令王昌及早商量定令人家依數做下準備使用不可悞事也 箔場近日如何般墮并出買如

何也向後可照折欠此事常宜用心 王昌處米麥絹  
錢索足未今並在何處收附所云趙祐請米又是何米  
後信子細說來出京時舊厯上未請物數令王昌錄一  
本來仍開說後來已請見今未請 惟真處畫四本總  
了便與附來 黎直講并彭州劉比部書並早與附達  
見吾省副再三伸意續有書也近日羣議如何謝上表  
到後莫有云云否因的書中略說來不妨曾學士書汝  
去相看自送與

又同前

十八日王昌等到得汝書并寄來生日信物依數並領  
知汝與諸幼各安此中上下並如常汝可勿憂只是聞  
得迎孫患痢甚憂得王昌來時書中只言稍減次日送  
黃清急脚回書中並不言增減以此不能無憂才得婆  
孫稍安又却大姐患痢料得煎迫可知醫人須著照管  
且頻與錢但於房錢內取及他事少錢使但於房錢內  
隨多少取使不須先來問也只是分明上厯記數與隨

手印押夏陸二人或請一月米各與五石昨送香合來  
依常年例各與酒一瓶侯威亦與一瓶汝昨寄文字比  
舊甚進可惜中止已得塗轍可以力進也吾此公事絕  
少渴已減但瘦少力及耳聽漸重然未甚妨事皆可勿  
憂此後恐人便漸少但過十日無人便發書即於遞中  
附一信來此外夏熱各好將息六月二十三日押付發  
賴酒二瓶且可喫毫酒更不及團茶新舊三餅 紙請  
取一月九舅作捉箔場亦須照管 排祭事已指揮王

昌也只是祭文不知用不用速與問如用時覓一箇本子寄來蓋全不知體面也更靈駕起時百官皆服初喪恐代拜要孝衣更早擘畫韓維龍圖昨因何出辭賴求襄何故不得而得汝問沖卿便知書中報來待發書往汝略要知爾謝上表到多時因何不傳若傳人言謂何及今諸事有何議論亦問沖卿便知子細報來此中如井底焦秘校所論如何且頻與見彼新自南來必載柴米來如無時速報來曾學士處國史送來

足也未或未足早取令足報來

又 熙寧四年

昨晚令此防送兵士將書去今早果是送汝兵士回得  
汝書知到頽安樂頓解千萬憂想自此三五日因人或  
縣遞頻附一信來也他事若漸有次緒亦言來謝大伯  
花園與漕口莊帳曾問當未花園目見如果可買亦緩  
為之莊難看勿憑說者切在子細也吾今日已在假餘  
事續書言去二月二十三日押 所云州官來則復謁

思之未便如倅幕縣宰須一先謁常禮不可闕也寫書  
了又思得此助役事方欲議行人戶驚駭見說賴亦如  
此旦夕得安撫文移陝西軍賊撲滅已多其餘此小潰  
散更俟續報若一成定搢則過聖節可陳乞爾恐知恐  
知二哥一向不得書憂損憂損吾却且視事蓋不請假  
亦自可下表在毫時如此也此中吳寺丞久不安似虛  
勞恐知恐知

又 同前

近送配軍人行有書去必到尋而急足回得汝書知在  
頽安樂甚慰甚慰數日無書去為等姚都官行然家中  
上下安樂別無事可勿憂吾在告已十餘日二哥自京  
有書來言自家求休退都下別無議論西事亦不如傳  
聞別無警急但一二相愛者恐時方惡人求退懼有不  
如意事爾若止如此苦無可卹三五日欲遂入削爾恐  
知恐知候入削了去報也韋保屋必已下手也如前所  
說甚好只是郭天錫不可專委須自挂心韋保屋了汝

且謀歸要去時却去此中近故也州官盡曾看否且與  
周旋續思頴詩何為却不刻石問得言來更數事別有  
畫一向熟好將息頴附書歸三月五日押付大哥 襄  
州酒二瓶不甚好但少勝頴爾少喫發風物酒亦少飲  
千萬千萬科場尚遠勿甚勞也

又 同前

初六日姚都官行令急足隨去附書并酒計昨日已到  
也前日揚嬰入州得汝書并信物等並足知汝在彼安

樂甚慰此中內外並如常吾在假已十七八日表并劄  
子寫下數日遷延未發今日待發凌晨忽聞邊事緊急  
又却未敢發然素計蹉跌身心躁撓無地自容蓋悔恨  
者去就之計不能自決若去秋在賴便陳乞安有今日  
之悔到蔡又直遲疑至今是自家做得今欲歸咎何人  
然昨為黎教授云云遂陷惑至此初八日決已發表封  
遞角次又得黎書切怪在假仍戒勿輕發遂又遲疑信  
知是一冤家冤家邊事未有涯自家退計杳未有也汝

書言待蓋草堂并庵此不急之務不是汝去時議定且只脩房錢緊急因何又却及此吾此書到切更勿議蓋也那取人工物料錢物等候韋保屋脩了更脩取此房錢緊急處千萬千萬今此書只為言此一事切聽切聽此外好將息頻附書歸三月十一日押付發 謝家園子前書已言去莊帳子不要今却附去致莊之說且已候汝歸細議也有說有說

又 同前

劉宗去後防送人回得汝書知汝在彼安樂甚慰只是  
知二十三日方卓立韋家屋子約須一月方了不知汝  
甚時歸得本望聖節前到家爾兼漸向熱宜且歸也此  
中上下並安可勿憂吾已出廳五六日本為西賊驚傳  
今得諸處關報皆云招捉潰散無多也吾之進退自此  
以後自決於心如事從容希恩禮悠悠之談相悞至此  
也劉宗去時書中事甚詳此更不多言文論并詩頻作  
甚好惟愈熟則工矣青州兩料職租不久來當盡送去

脩房錢也恐知云遣郭天錫日望其來此外好將息三月廿五日押送大哥 二哥此中亦久不得書可怪可怪

又同前

前日兩步關兵士防送行有書并掩子必到今日蔡州大風微雨陡寒思汝數日前盡將綿衣寄歸不知彼中陰晴與此同否憂汝驟寒都無綿衣吾與孃憂心不能安今立走急足送綿衣去急足到立便令回或汝歸時

帶來亦得未歸先遣回亦得餘事前書已說也好將息  
四月九日押送大哥

又 同前

近兩步闕押賣藥人去有書續又專遣急足送綿衣去  
有書計皆已到今日郭順來得汝書知在彼安樂甚解  
憂想此中老幼各安可勿過憂蔡人今歲絕不疾疫但  
寒暑不常昨初九日大風寒所以專令送綿衣去及問  
郭順乃云九日潁州大熱方解憂心郭順云脩造有次

第汝欲二十頭可歸然不知何故更令郭天錫先歸也  
累書云問汝歸日皆不言孃甚怪然韋業了其餘小者  
可委劉宗大者必下乎未得也此中亦自有事要汝歸  
面議此書到千萬且歸它事前書已詳餘好將息四月  
十二日晚押送大哥 二哥十頭出京三五日到家恐  
知恐知

又 同前

前日吳廷平來得汝書知安樂近郭天錫來後便遣兵

士作子等去望人到汝便離賴至今已八九日並無息  
耗不免憂疑蓋賴蔡深夏不免人多不安故也此中內  
外甚安吾十九日已入却致仕文字若近例一削便允  
則旦暮間便有命尤要汝歸故更遣急足去如人到尚  
未起來即速且歸葦業已了只是屋下生活可委劉宗  
其餘前書已言候汝歸商量也所是準備吾歸賴之計  
今更未暇汝但且歸此中旦夕專望路中好將息四月  
廿六日午時押付發

與二寺丞

夾

熙寧三年

自聞汝失意使遣郭順去接汝次日又遞中附書去方  
憂悶次今日劉玉自京來得汝八日書稍知動靜若至  
賴見了大哥便先歸則今應已在路得失常事命有遲  
速汝必會得應不甚勞心却是旅中不如意漸熟難行  
故未免憂想若此書到尚在賴則且先歸為孃切要見  
汝蓋憂汝煩惱也汝切寬心求安如過亳州只約黎曹  
二君南臺相見勿入城千萬千萬此外路中好將息此

急脚子如路中逢見便帶取回一路使喚二月二十六  
日押付二哥奕



文忠集卷一百五十三